

張文襄公電奏

張文襄公全集卷八十三

電奏十一

致西安行在軍機處江甯劉制台濟南袁撫台上

海盛大臣轉全權大臣

光緒二十七年四月初七日午刻發

英參贊傑彌遜奉其薩使命自京來見兩次傑商賠款事問鄂省意見答以中國力竭須減數減息寬期傑云英深知中國情形不願竭盡中國財力商辯語甚多昨日接薩使復電云按原數四百五十兆四釐息不能減亦不索現銀改爲三十年攤還每年應攤還二千六百萬兩洞查西人計算本息表內數目相符懇其照薩使

前說減息爲三釐三毫或三釐半傑云英輕息可借他國不能借英當勸各國或能略減然不能定又商加稅事傑述薩使云除洋藥不加外可加至值百抽十按貨本運費鎊價核實合成銀數並云有數種物向無稅今可納稅蓋指洋人自用物而言但須進口洋貨出口土貨釐金全免問鄂省意以爲可行否答以鄂省一人私見以爲可行蓋約計洋關稅加至抽十歲可增一千六百萬兩以外進口洋釐出口土釐約計六七百萬兩兩釐均免關稅必旺必可歲增一千萬至出口土貨免釐乃富民勸工之本原與外國通商之要義各國出口土

貨大率無稅在我本當舉行今藉以增加關稅更爲有益
傑又問抵款事歷舉鹽漕常稅等項答以加稅約抵
一千萬鹽課釐約一千一百萬如息略減所差不多當
另籌惟鹽務只可作抵斷不能交外國人代辦此乃干
預我財政傑述薩使云不必交外人代辦英不願干預
中國財政言之再三語甚明確傑又云加稅事牽涉釐
金且關涉通商行船新章猝難議定此時不能以此作
抵答以只須查明確係進口洋貨出口土貨卽抽免釐
一言可決有何難議傑又云常稅可交海關代辦否答
以常稅亦只可作抵不能交海關代收蓋各關常稅船

鈔子口分卡甚多皆在內地遠者或至數十里外若稅司代收多與民人交涉局卡紛繁卽是干預我內政湖北三洋關皆無常稅此乃爲大局計傑力辯乃爲我謀生財非干預洞仍堅持問各節已告全權否傑云渠出京時未告全權此時不知已託傑將各節電復薩使并懇減息傑今日東下見江督竊謂總數四百五十兆一節恐難商減然較前說九百兆之數已省一百二十兆利息一節若能減息半釐歲可省二百餘萬薩使旣略有活動語氣只可姑與一商并託美國調停洋關抽十免釐一節管見以爲此是善政彼此有益但不知各省

意見如何加稅作抵一節如能再與切商照允庶免羅
抽無術鹽務作抵一節既言明由我自辦似可作抵至
常稅交海關代收一節萬不可行惟必當認真整頓薩
使來詢故就管見答之應請樞廷與全權裁奪籌商請
代奏遇辰

致西安行在軍機處

光緒二十七年四月初七日
午刻發

再傑彌遜力爭常關歸洋關兼辦敝處已力阻防其干
預內政并言湖北三洋關皆無常稅荆宜施道常關僅
收民船鈔爲數無多亦與沙市關無涉傑言湖北有木
稅可歸海關代收否答以新隄關竹木稅係漢陽府收

與各關道無涉且去年春鄂省將竹木釐金改爲統捐
裁併分局十七處減輕收數商便釐增確有成效今年
正擬奏明將新隄關裁除其竹木稅歸併鸚鵡洲竹木
釐局統收此後湖北並無木稅矣傑又欲將荆關船鈔
歸洋關代收答以各口散漫皆在內地動與小民交涉
實多窒礙未便洋關代收等語如稅司必欲干預常關
鄂省卽當奏明裁新隄關木稅歸併鸚鵡洲木釐局統
收恤商裕課均有裨益荆州船關亦不能交稅司致妨
內政謹先密行陳明請代奏遇午

致西安行在軍機處

光緒二十七年四月初八日
寅刻發

初三日德領來云該國穆使電詢鄂省德願撤兵惟正定順德一帶尙有匪徒仇教恐撤兵後拳匪必熾若中國能擔保拳匪不再起并能擔保中國兵力必能平匪則德兵可撤洞答以直境雜匪不能遽絕此係潰勇刦盜土匪斷無大夥拳匪卽有零匪兵力必能剿平國家必能擔保又問鄂省能擔保否答以鄂省能擔保德領又問董福祥有帶兵東來之說確否答以斷無此事此乃津報訛傳董帶兵十營撥餉一兆皆係謠言蓋因晉撫岑帶本部十營自陝來又聞請餉百萬准撥數十萬故有此誤董已罷職家居安得有兵安得有餉各報最

好造謠挑衅萬不可信至邊外蒙民大率愚魯不能生
大事且恪遵朝命傳言四子部落仇教之說亦不可信
囑其電復穆使切勸瓦帥勿再派兵至張家口外等語
德領允轉達竊惟洞與外人應答只能如此一力洗刷
擔承惟直境遠近盜匪猖獗多有快槍皆係潰勇合土
匪爲之雖發端本非拳匪本意亦非仇教然藉仇教以
煽愚民則勢所必有望朝廷速派幹員重兵迅速剿捕
解散方免藉口蒙部愚拙不曉時勢容或有仇教之空
談亦懇朝廷剴切諭飭免致召敵西行若直匪不平蒙
地不靖後患難測非全權口舌所能勸阻至各報造謠

釀禍最爲可惡可憂但此事無從禁阻尙須另思善策容再籌之請代奏虞

致西安行在軍機處江甯劉制台濟南袁撫合上

海盛大臣轉全權大臣

光緒二十七年四月初八日未刻發

遇辰電奏想達加稅一節英參贊傑彌遜云進口洋貨加足抽十出口土貨加足抽五當年定稅則時土貨價賤今物價貴所抽實不及百分之五可按時價加爲抽五等語查洋貨稅六百餘萬加洋人自用物稅約百萬共七百萬洋貨實止抽三若按鎊價折銀抽十是加七成可歲增一千四百七十萬兩土貨稅約九百萬按今

日物價實止抽四或僅抽三若加足抽五是加二成有奇可歲增二百三十餘萬兩兩項所加併計可增一千七百萬兩除抵免進口出口釐金六七百萬外實可歲增一千萬前電只係統計未將洋貨抽十土貨抽五分析言之茲再照傑參贊言語詳陳以備據此核議查土貨稅輕乃於中國最有益之事請代奏霽

致西安行在軍機處

光緒二十七年四月十二日
子刻發

昨奉寄諭恭悉但可開科亟願舉辦連日與司道及各紳籌商查長江票匪勾結鹽梟意圖大舉報復屢接江督電該匪勾引外國流氓及前數年洋人美生案內之

匪黨私運炸藥入江亂黨注意尤在湖北已經屢電上
陳消息至今未鬆現正治軍購綫嚴防密拏接上海函
電云各國兵船欲入江保護商教江督力阻甚費唇舌
蓋票匪蹤跡全在上海租界各領事知之最真英法德
新來漢兵船今尙未去今日又有奧船三艘來漢其泊
兵船十艘從來所無各處遣撤營勇紛紛過漢極力防
查深爲懸心以後散勇過者必更加多看此情形今秋
勢難舉行鄉聞詢據省城各紳皆云先保身家性命而
後可講功名官紳眾論皆同可見情形喫緊且英參贊
來言欲阻京城明年會試廷試當經電奏尙不知全權

如何開導籌議設會試尙未定議今年新中舉人明春
仍無會場可進然則明秋鄉試與今秋鄉試相同遲早
似不爭一年仰懇朝廷俯鑒鄂省江防緊要情形仍准
展至明秋鄉試請代奏真

致西安行在軍機處

光緒二十七年四月十六日
亥刻發

江鄂今秋鄉試萬難舉辦已由電覆奏聞山東湖南亦
請展緩順天山西尤多阻格竊思科舉一事爲自強求
才之首務時局艱危至此斷不能不酌量變通半年來
諮訪官紳人士眾論僉同粵督陶東撫袁咨來奏稿言
之甚爲懇切改章大指總以講求有用之學永遠不廢

經書爲宗旨坤一等覆奏卽日詳陳擬卽照光緒二十四年之洞所奏變通科舉奉旨允准之案酌辦原奏乃係參酌古今求實崇正力駁侈談新學者之謬論不過原本舊章力求核實而已大略係三場各有去取以期由粗入精頭場試中國政治史事二場試各國政治地理武備農工算法之類三場試四書五經經義經義卽論說也原奏經禮部通行陝西有案可查惟聲光化電等學場內不能試驗擬請刪去此事究應如何酌改自應聽候朝廷飭議裁定總之今日中外大勢科舉不改章勢有不能然改章之始士林必須寬期肄習擬請旨

先行宣諭現正議科舉改章講求有用之學仍必崇尙五經四書所有展緩鄉試省分各士子正可藉此一年之暇精心講求俾臨試時得以盡其所長則多士知所嚮往益可安心肄業不致懸盼疑阻惟科舉要政當必俟各省奏到詳核妥議此次諭旨可否渾言大略但將講求實學不廢經書之宗旨揭明其詳細章程俟定議後再行頒諭通行則諸事皆無窒礙愚昧之見是否有當伏俟聖裁請代奏劉坤一張之洞同肅諫

致西安行在軍機處

光緒二十七年四月二十二日丑刻發

和局漸已定晉防無事提督程文炳所統各軍已奉旨

飭回原省湖北所派總兵方友升統帶之武功營自應一律調回鄂省分別撤留以節餉需請代奏駁

致西安行在軍機處

發後轉劉制台 光緒二十七年五月初五日辰刻發

全權議賠款分四十四年共一千零七十五兆前十四年數雖少第十五年起至第三十年每年二十一兆四十五萬零數已不少第三十一年至四十四年每年三十三兆七十四萬零爲數太多其故由前四年全不還本次十年還本太少故受此虧竊思籌款固難然能籌一千八百七十餘萬何在二三百萬乎總之每年及早帶還本銀若干方爲合算此時洋兵已漸撤議賠款之

年限並不甚急務請暫勿復允但催其將抵款商定電聞看其擬以何款作抵方可籌酌此數日內容江鄂詳加核算有何稍爲輕減之法再請鈞處統籌核定全權見表後十八日始電奏可見遲早不爭數日望勿急遽至禱請代奏歌

致西安行在軍機處

光緒二十七年五月初八日辰刻發

賠款事薩使每年二十六兆之議全權旣以多籌八兆爲難竊擬有酌中籌還一法目前每年約只多籌四兆共分三十六年還前十四年每年還二千二百萬第五年至第三十五年每年還二千六百萬第三十六年

還一千一百九十六萬四千一百三十兩總數共八萬六千五百九十六萬四千一百三十兩核算無誤較全權議還完早八年半除前二十九年多還本銀之數抵除外所省約二萬二千萬查前二十九年雖較全權所議略增然前十四年僅多或四百萬或三百二十二萬後十五年雖多四百五十四萬零而舊債表爲數漸輕海關已盈餘一百二十七萬零實仍只籌三百二十六萬零第三十年至三十五年則每年少還七百七十四萬零第三十六年則少還二千一百萬矣第三十七年至第四十四年既已還清則每年省三千三百萬矣竊

思每年最少需還十八兆亦必須中外合力另籌大宗
鉅款方能應付卽多籌三四兆似尙有策而總數所省
實多免致三十年後忽增鉅累嘗考法爲德破賠款極
鉅其國民同心努力趕先籌措於未滿年限之先卽行
清還各國驚異謂其志堅氣壯不數年法國復強蓋謀
國之道當計久遠微弱時尤甚若目前不避艱難早圖
自振是爲生機若苟圖一時輕省不計久長是爲敗氣
強弱進退之消息實在於此至撤兵一節久經各使言
明利息議定卽允撤兵斷不至因籌商年限另思變計
卽使全權所議已告各國而此次所擬辦法乃係提前

還本當必更願臣等非與全權立異同特爲國家億萬
年計不敢不言仰懇聖明裁奪請代奏劉坤一張之洞
同叩庚

致西安行在軍機處

光緒二十七年五月十四日
申刻發

閱全權電奏稿各使欲乘黃轎在乾清宮前降輿實堪
駭異公使雖待以客卿究是人臣若國君遊歷來華又
將何以待之且各使與各國太子親王禮節亦有等差
卽黃轎亦不應乘坐各使不顧中國儀注獨不爲本國
留體制乎此節無論如何萬不可許竊思各使力從驕
倨不過欲洩其攻館之忿查外國之待公使遇有大典

禮則國君必遣其自坐之車前往迎迓此各使所以藉口也然各國君向無黃轎故其國臣民不以爲異行之中國實駭物聽恐因此或生事端此時似宜籌一抵制之法或令上駟院備良馬數匹卽稱爲御用之馬遇各使有大典禮覲見之時卽用此項馬匹前往迎迓平日則否抑或別予優異總以阻其黃轎詣宮爲斷懇飭全權設法婉商以存國體再各國使館留兵之數亦請飭全權查明據實奏聞請代奏劉坤一張之洞同肅鹽

致西安行在軍機處

光緒二十七年六月十一日
午刻發 發後轉劉制台

簡電悉俄約責我以東三省吏治而盡將兵權利權政

權奪去專令我壓制華民以供俄人之役使而已利則歸俄害則屬我名爲俄還東三省於我之約實則我讓東三省於俄之約也從前疊次電奏屢經痛切瀝陳此約若成不獨失關東各國必將效尤瓜分內地各省亦不能安全矣俄鐵路到京駐兵護之則法亦必以護路爲名駐兵直抵京外他國皆沿鐵路駐兵豈止各省不安京師亦不能安矣各國聞之尙爲我危苦口勸阻中國稍有忠君愛國之心者亦皆痛心疾首請勿畫押豈得謂爲謬論李相偏執己見幸聖明在上燭照堅持俄謀遂爾暫沮然俄人垂涎已久早視東三省爲己有貪

心未息若不趁此藉各國公議令其撤兵斷無甘自退讓之理暫踞終成永踞矣數月來江鄂往返籌商並探詢各國外外部惟有趁此公議之時請各國公斷一策將俄人自立之約不論庶俄在各國之前不敢遽食前言明居不義之名屢經電奏在案江鄂惟知爲國家社稷計孰謬孰是朝廷自有明察天下自有公論江督昨電樞廷轉電全權照會領袖公使詰俄退兵之期以觀俄人動靜方可籌措置之方此照會無論有益與否有何妨礙況此辦法本係日本外部之意而英美德三國外部均曾勸我交北京公使公斷四國公使一見照會定

必從中以公論相助李相前勸畫押或者因恐決裂爲俄所愚今逾期不畫俄國竟無動靜自當悔悟急救乃堅執不肯照會豈始終爲俄所愚耶抑別有成見耶不顧國家之安危而專與同僚爲水火大臣舉動不當如此查萬國公法戰後立約約未提明者悉照戰後情形今北京公約俄在其內賠款數目俄國最鉅東三省兵費路費亦在其內李相與各使屢次會議照會於東三省撤兵從未提及必然永照現在情形矣一失此機以後無法補救近聞各國公使一俟大綱十二款全數議定卽行各自回國若此時不議各使回國後再不能議

悔不可追矣伏祈迅賜電飭全權務卽日照會領袖公使詰俄撤退東三省兵隊日期並請各國爲我將東三省善後諸事秉公公斷各國若肯公斷或竟可不立專約至美日兩國所請將東三省開門通商辦法最爲善策欲永保東三省不爲俄佔非藉各國牽制不可亦望飭令全權照會各國言俄已言明不占我土地一俟俄將三省還我時卽行開門通商許各國以居住通商開鑛製造一切利益等語則各國均冀中國永保東三省自主之權不願別國來侵且似此措詞亦甚虛活俄心雖不悅而無詞以責我庶幾祖宗根本之地可望收

回中國全局不至自取分裂天下幸甚請代奏軫

行在軍機處來電

并致全權大臣及劉制台 光緒二十七年六月十五日申刻到

奉旨諭奕劻李鴻章劉坤一張之洞等前後論俄事各電均覽悉二月初間中外諸臣僉言俄約一成卽啟瓜分之禍朝廷熟思利害不得不爲停畫此事勢之當然本無所容其成見乃自是之後李鴻章誤以畫約爲劉坤一張之洞所阻至有江鄂爲日人所愚之言劉坤一張之洞又以李鴻章爲偏執已見亦有全權爲俄人所愚之言彼此積疑負氣爭論究於國事何補該大臣等受恩深重上年共扶危局各著勤

勞方深倚賴國步至此同心戮力猶懼不濟何忍自相水火詒憂君父見笑外人平心而論李鴻章身處其難原多委曲然時有不受商量之失劉坤一張之洞慮事固深而發言太易亦未免責人無已要之俄約自難全廢終當設法改訂俄人交還東三省若仍奪我兵權利權名還而實不還害豈可言且各國起而效尤則內地之禍何堪設想必須乘公約既成之際向俄使商定前約婉與磋磨並卽照會各國公使請爲公議便可詢問關東撤兵日期以觀動靜若能將東三省許各國通商得互相牽制之益庶幾根本

之地可保全局亦安應如何辦理之處著責成奕劻
李鴻章趕緊籌商務臻妥善速行具奏劉坤一張之
洞有會辦之責亦不准置身事外特此開誠申諭該
大臣等同一竭忠謀國務各互除意見和衷經畫挽
回氣數共濟艱難實有厚望爾功爾過不能逃朝廷
洞鑒也欽此願

致西安行在軍機處

光緒二十七年七月初九日
午刻發

前聞直晉全省停考敝處於四月內電致英薩使德穆
使以直晉滋事之處雖多而安靜地方亦復不少若鄉
試全停波及無辜土心定然不服於將來民教相處大

有妨礙與大綱內滋事城鎮停考一語亦不相符應仍照原議查明何處滋事停何處之考卽多停一二十處亦無不可但不應全省停考各國意以北京太原兩處滋鬧最重不允在該兩處開科惟有借闈考試之法擬直隸借山東闈山西借河南闈將滋事各處剔出不准赴考懇其轉商各國以免累及無辜並告以滋事地方生監斷不能混往應試蓋學院咨送監臨收考主考出榜皆須查照學冊填明籍貫不容假冒亦非臨時所能更改旋接英薩使復電直晉不滋事地方可借闈鄉試德使復電云彼甚願照辦惟有人不以爲然至爲抱歉

各等語復又電詢英使乃含渾復云遵照四月廿五日
上諭辦理又查江督劉來電云借闡鄉試事商英德兩
領事均允電商公使據云必可照准過數日德領函稱
倣國欽差來電將與各國商議倣國欽差之意以爲此
事必可照辦嗣又接德使電謂各國有窒礙等語可見
英德兩使於此事毫無成見且甚願通融又湘撫電云
全權電告衡州府清泉縣可免停考又全權電云江西
鄱陽縣法使允免停考查衡州清泉乃滋事甚重地方
然則法使亦非苛求者英德法三大國皆不固執切實
與商當能就範茲和約不日畫押停考事各國再請明

降諭旨伏懇朝廷飭令全權趁此務與各國切商直晉兩省不滋事各州縣准其借闡鄉試俾免無辜向隅以期民情帖服幸甚請代奏佳

致西安行在軍機處戶部

光緒二十七年八月初六日丑刻發 發後轉

劉制台
陶制台

恭讀電傳邸鈔七月十三日諭旨推廣暢行銀元專令湖北廣東兩省鑄造竊思銀元一事乃整飭銀幣大政自以多鑄廣行多收多發爲要風氣方能轉移官民方覺便利積弊方能早除且認真辦理盈餘甚微必鑄數甚多方有餘盈可計計各省應解應放之款卽按三成

計已在二千萬以外鄂局機器不大現正添機擴充粵局機亦小洞所深知鄂粵兩局所出不多不足供各省解款發款之用添機尙需時日江南銀元局機器甚大閒廢不用亦甚可惜似以江鄂粵三局並造爲宜若慮製造未精儘可嚴飭該局認真化驗製造務令三局一律惟向來各省辦事往往各分畛域章程參差以致互相妨礙不能通行此次必須三局事事畫一至鑄本最爲難籌除本省外必須將某省附於某局代鑄豫先議定一公平辦法務令其將本省自用之數與外省附鑄之數合計三局大率相等庶鑄本多少不致偏枯以免

畸輕畸重自相擠壓暢滯不一不然江南財力數倍於
鄂鄂局不能支矣此節如蒙俞允三局並鑄再當與江
粵電商會同奏辦再收放俱搭三成一節似尙應稍加
變通竊謂不如改爲收放俱搭一半較爲簡易蓋各款
多有畸零若三成則核算甚繁仍多不便若一半則易
於折算罕有錯誤可否由各省酌量試辦並懇請旨裁
定以便速籌舉辦未盡事宜尙多容會商續陳請代奏
歌

致西安行在軍機處

光緒二十七年八月初七日
未刻發 發後知照劉制台

傳聞英人於六月杪照會全權言長江一帶通商口岸

直抵四川重慶府爲止均須由彼駐兵防衛又照會問東三省俄約是否另議或仍前說作何歸束所得利益是否各國一律均霑約期索覆等語雖未敢遽信爲實然傳聞藉藉恐未必盡屬無因如果屬實顯係效尤發端未知全權曾否奏明如未奏擬請旨飭詢全權英使是否有此照會果確如何答復速令據實電奏如並無此照會更所深幸一詢似亦無妨事關全局坤一等既有所聞不敢緘默請代奏坤一之洞同叩陽

行在軍機處來電

并致劉制台 光緒二十七年八月十二日午刻到

陽電當卽轉詢全權頃據電復六月杪以後英使不

但無照會長江一帶駐兵之說并未面有此議不知江鄂從何處傳聞至英俄猜忌素深東三省俄約英未必不關懷然從無一語詢及豈能遽動照會自冬及春各處皆以效尤二字聳動上聽究竟所欲效尤者何事請隨時確實考證勿使浮言徒亂人意云云特此奉達樞蒸

致陝州行在軍機處

光緒二十七年九月十一日寅刻發

籌款爲今日急務數月以來屢與鄂撫及司道詳議不獨賠款過鉅憂焦無策而鄂省舊款洋款撥補鹽釐無著之款約四十餘萬新增加撥無著之款約四十餘萬

去年防務鐵路新增之款除極力裁汰外不敷尙多且
自強要政如興學製械練兵游歷諸大端其勢不能不
趕緊舉辦武漢乃各國屬目之區斷不能因循停緩致
起外人輕侮之心但鄂省枯窘萬分籌款亦非一項所
能集事惟有先辦鹽釐加價一事較爲平允易行擬就
鄂省境內籌計無論淮鹽川鹽凡行銷湖北境內者一
律加抽四文以爲湊補各項要款之需於未接部文之
前早經議定前於八月內已與江督疊次商妥江省加
釐三文歸產鹽之江省用鄂省加價四文歸銷鹽之鄂
省用敝處并同時電商川督奎言明當經劉電奏告鄂

頃准戶部咨因江督奏加淮釐三文行知各省照四文
加增查江督原奏聲明請旨飭產鹽省分一律加增所
謂產鹽省分係指川粵閩浙等省而言與湖北無涉湖
北并不產鹽只能銷鹽加價係取之於鄂省食戶卽江
省加釐雖令運商交納亦仍係取之於銷鹽省分之食
戶江省爲江籌款而加釐鄂固不便阻止鄂省爲鄂籌
款而加價出之鄂民自與江省無涉日內本擬卽行具
奏因准部咨恐奏到後部中或未能分晰故特電奏聲
明鄂省加價四文仍當卽日速行舉辦至江督所指產
鹽省分之加釐三文能否酌加應由產鹽省分籌議與

鄂省加價另爲一事免致以鄂民多出之錢徒供他省之用庶幾新案賠款及舊日洋債抵補無著之款稍資補苴而自強新政亦可實力奉行不勝切禱至賠款大宗當與鄂撫及司道籌有辦法再行會奏請代奏眞

致洛陽行在軍機處戶部

光緒二十七年九月二十日酉刻發

刪電謹悉川淮鹽行銷湖北境內者自十月初一日爲始一律加抽四文毫無偏重歸湖北省自用與江省川省令運商交納者無涉已與江督川督商定除飭鹽道及宜昌川鹽局淮鹽督銷局照辦外謹電陳請代奏之洞端方同叩寄

致洛陽行在軍機處外務部戶部

光緒二十七年九月二十一日

辰刻

發

賠款緊急現擬在宜昌關土藥稅加抽二成本省各局
土藥稅釐亦加抽二成自十月初一日開辦亦稍資補
苴之一端查湖北土藥稅釐上年已加抽三成今又加
抽二成並不病民此款專爲湊還新賠款而設不與他
項稅釐相涉合併聲明除飛飭該關局迅速照辦外請
代奏懇速示復切禱之洞端方同叩箇

致鄭州行在軍機處

光緒二十七年九月三十日
午刻發

各省設立學堂已遵旨竭力籌辦惟前奉諭旨但言選

舉鼓勵酌議具奏未蒙明諭作何項出身查坤一之洞
原奏聲明州縣設小學堂畢業者作爲附生府設中學
堂畢業者作爲廩生省城設高等中學堂畢業者作爲
優貢欽派主考會同督撫學政考中者作爲舉人京城
大學堂總裁考中者作爲進士誠以必須朝廷明示以
登進之階科目之榮則士心自奮人才自多足爲國用
其自外洋遊學畢業得有憑照者已奉旨准作舉人進
士則內地學成欽派考官取中者自應一律登用方爲
允協且天下各府州縣徧設學堂經費極鉅止能於省
城創設數處以爲提倡而示規模若全省均由官籌款

斷無此力東西各國均無此辦法若舊日書院經費甚微就地勸捐微末無濟是學堂終不能多人才終不能出惟有明旨准作爲進士舉貢生員則民間自然集貲興辦不待官籌最爲善策時艱需才不宜再緩仰懇明旨速行大局幸甚若詳細章程不能遽定似可渾言准其分別等差作爲進士舉貢生員則詳章仍可候禮部細酌毫無窒礙再改科舉一事已奉旨允行惟坤一之洞原奏係請三場分場發榜可以防考官草率偏重三場仍如一場此宋名臣歐陽修之策本朝通儒錢大昕之論似屬妥善蓋偏重前兩場則恐涉駁雜偏重末場

則仍患空踈雖廢八股與不廢等恐不足以仰副朝廷
求才自強之至意惟有分場發榜則場場認真互相維
持有實濟而無流弊且鄉試人數由萬餘人至二萬人
發榜中省約須一月大省加多寒士候榜日久資斧艱
難至場內膳錄場外遊民動滋事端極費彈壓坤一之
洞皆屢充鄉闈監臨深知寒士之苦彈壓之難校閱者
爲多卷所困房官草率主考疲勞於甄拔眞才之道種
種有妨若分場發榜寒士免久候內外簾各官免昏疲
地方少事端假如中省頭場八月二十五六日發榜二
場九月初七八日發榜三場九月十五日發榜僅多五

日而人數既少事簡弊清經費轉可節省洵爲一舉數
善其頭二場之榜或卽照學政歲科考先發紅號尤爲
簡速至謄錄一項實可刪除訛脫煨失作弊改竄大省
尤甚試思萬卷筆蹟考官豈能辨識若欲舞弊仍可藏
關節於字句之中防弊實不在此似以省之爲便坤一
等因學堂必須急辦然非民間自辦不可欲三場有實
濟而無流弊非分場發榜不可各省情形皆同若待各
省議覆禮部核奏爲期太遲士心游移觀望鼓勵難期
謹先電陳伏候聖裁請代奏坤一之洞同叩卅

致鄭州行在軍機處

光緒二十七年九月三十日
午刻發

兩月以來連接李使轉日本外部各電力勸勿遽允俄約事日外部皆紛致江鄂因江督均已電奏故未複陳現在李相已故俄約尤宜從緩查日本屢電要義在中國若緩允俄約必有好結局若欲定俄約必先商日本數語李相所電俄人新擬數條僅止不提鐵路造至關內而已其於侵我主權止准設巡捕兵不准設礮兵及獨占鑛路工商一切利益絲毫未改退還年限亦甚含糊閃爍包藏愚我實甚日本如此助力若倉卒定約日本必怒首先效尤英德意各國繼之不惟遼不能復大局危矣務望朝廷從緩再議熟思審處詳考各國情形

以俟機會不勝悚切請代奏卅

李欽差來電

并致劉制台
十二月午刻到

光緒二十七年九月二

頃外部言聞俄廷以新約底五款交全權一前次議
約及一切議論概行作罷從新訂款二東三省全境
並牛莊交還惟榆關至牛莊鐵路限畫押之本年內
交還三畫押之本年內奉省俄兵全撤四定約日起
兩年後吉林黑龍江俄兵陸續撤退五中國派兵應
由盛京將軍與俄武官商定惟不得用礮隊以上各
款如果確實中國仍未可盡允數日前日本已電駐
京署使面告慶邸大致謂此次俄約較前已輕惟所

開條款不但中國未能滿意卽在俄亦不能算讓盡
現未見全約固難逐款議駁惟四五兩款則深知不
妥必須駁改第四款撤兵之期語涉含糊第五款侵
奪中國主權凡兩國訂約語意含糊者弱國多受虧
因強國每將含糊之語自作解說逼令照認如第四
款照允撤兵之期由俄自定勢必遷延與永踞何異
須改爲吉林黑龍江俄兵限定約後一年內陸續撤
退如第五款亦照允則邊防永弛日後設有內亂亦
難彈壓俄必藉口再據其地此款應添改俄兵撤完
之日此款卽行刪除一語以上兩款儻俄不肯改應

即緩商極於中國有益俄前布告各國語太結實因
亟思訂約以銷前案其情甚急設不得已仍當減輕
日本前因俄約屢勸全權並電鈞處一面並勸俄廷
此次復告皆爲東亞大局起見幫助中國實出至情
聞新約日內將定雖難遽信但事關重大深望鈞處
此時格外留意體察情形奏懇朝廷慎重勿信一面
之詞免誤大局設有疑難務希垂詢日本政府俾從
速代籌勿誤機會爲盼並請鈞處將日使告慶邸各
節轉達政府等語囑電陳乞鈞奪鐸號

又

光緒二十七年九月二十五日申刻到

頃外部言俄約新稿應駁應允之處前已詳陳頃得
確電五款之外尙有東三省鑛務專歸俄人辦理一
條似此實於中國與各國現約大有妨礙萬一照允
恐東三省之外各國不免效尤爲害甚大深盼鈞處
奏懇朝廷堅執勿允以保大局等語囑電陳乞鈞奪
鐸迴

致開封行在軍機處

光緒二十七年十月初二日
丑刻發

頃英總領事法磊斯函云昨夜接奉本國國家來電指
摘近日俄約各款其尤爲窒礙者三條一所有一切賠
償已包在總賠款內俄國鐵路亦應在內不應另索賠

償二俄人欲專攬鑛利有違條約恐各國將與中國爲難三中國在東三省行政應有自主之權禁用礮隊便有礙此權等語本領事意見照此約俄人并非交還東三省若中國允照此約則中國名爲收回東三省實則允俄永佔自棄主權且開效尤之端若中國不允照辦而俄仍自佔踞則俄爲公論所責自食前言結仇日本蓋此時不允將來猶可議及若允之則案已結不能再議矣英人因去年北方之事未免與中國略有意見若中國能堅持力爭東三省應有權利且於中國政事真心變法則英國國家以及人民自必樂於勸助也等語

英政府明言俄專遼東之利則各國將與中國爲難是
俄約萬萬不宜輕定所謂效尤爲難者各國分佔中國
鑛利內地鐵路皆駐洋兵保護之謂也長江則事事須
問英山東江北則事事須問德福建江西則事事須問
日廣東西雲南則事事須問法蘇浙則英意合謀權利
盡矣不可爲國矣謹飛電上陳請代奏東

致開封行在軍機處

光緒二十七年十月十六日
酉刻發

各省分派賠款爲數過鉅籌措萬難方今民生困窮商
業彫敝經去年之變各省商民元氣大傷種種籌款之
法歷年皆經辦過久已竭澤而漁若再痛加搜括民力

既不能堪賠款仍必貽誤且沿江沿海五省鹽釐貨釐
久已抵還舊案洋債撥補大半無著近年加撥各款多
係有名無實無法籌解而自去年以來南北各省鬧教
賠款多者二三百萬少者數十萬卽不鬧教省分攤派
直隸教案賠款亦二三十萬至十數萬此又出於各項
餉需之外民怨已深正苦無從設法自新案大賠款經
全權定議後數月以來屢與司道各局籌商無不焦思
束手雖勉強蒐羅斷難如數且卽所擬議奏明籌捐加
收之數將來亦恐難收足實無把握間有議加貨釐者
乃是無聊之極思竊恐驅魚驅爵徒歸洋旗子口收數

轉不能多若按糧捐輸少則無益多則必然扞格房捐雖有辦者亦不能多各種籌款之法無一易辦者總之無論如何籌加籌捐無非取之於民當此時勢民心爲國家第一根本以民窮財盡之時儻再儘力搜括追呼以供外國賠款必然內怨苛政外憤洋人爲患不堪設想否則商挂洋旗民入教堂國勢何由固結臣等渥受厚恩分膺疆寄若因籌賠款之故以致稍生事端罪戾滋重若百事俱廢專湊賠款將興學練兵農工商務一切養民治民衛民之自强要政概行閣置不辦則民心日渙士心日離國勢日微外侮日甚內亂將作大局亦

必難支惟賠款豈能失信竊擬一稍紓民力之法蓋各省賠款數鉅籌足固難而尤以明年上半年一期爲更難籌款甫經試辦尙無端緒期限已迫必然貽誤查十月初一日起洋貨加足值百抽五一條據上年二月總署咨赫德條議每年可增加三百萬以內卽按九成核計亦可歲增三百七十萬向來免稅洋貨亦按抽五納稅一條據稅司賀璧理現開節略照二十四年免稅各物計每年可收三十二萬據盛京卿宣懷條議爲數更多常關歸稅司代收一條據德國穆使自天津來與之洞面言津海一關稅司代收每年可多收三十萬準此

類推除粵海關不歸稅司外赫德初次指定之十四關及外務部咨赫德二次添指之十關局合之天津關共二十五關局每年必可多收一百五十萬有盈無絀折漕一事現經漕督張奏請以二兩折放九十餘萬石令浙江購米五十萬石備用折解折放者每石省運費一兩三四錢每年可省一百三十餘萬卽照倉場文令江浙運米一百萬石每年亦可省約七十萬合之山東折漕省出運費約二十萬省挑挖運河等費約十萬南北各省折漕合計總可省一百萬以上四項統計或增收或裁省共得五百五十萬就每年各省賠款一千八百

萬之數核計正得三成有奇伏思洋貨加足抽五免稅之貨完稅常關稅司兼辦全漕改折四款乃各國公使及全權所指定者本議明專爲賠款而設戶部咨亦有關稅增數專爲賠款各省攤數尙可酌減之語具徵體恤擬額懇天恩俯念民生困苦鉅款難籌准將各省賠款減免三成卽將上項所指加增裁省之款湊足各省上半年止解二成下半年解五成以紓民力而免貽誤此減贖七成自必如期籌解不敢延欠惟所指抵湊三成之款必須明年十一月方能收齊而明年上半年五月還期萬不能緩擬請敕下戶部盛宣懷及上海道向

外國銀行如匯豐德華之類商借五百四十萬約定明年五月半交銀一年歸還酌給利息能止借八箇月尤善國家止借此數並不爲難年限既少卽利息稍重亦屬有限俟明年十二月間核計所指增收裁省各款實得若干如足敷三成及息銀卽請於光緒二十九年令各省以後卽照此七成之數籌解如洋常兩稅於抵足三成外能再多收一成一百八十萬各省卽再減一成能再多收半成卽再減半成如尙不敷三成及息銀則請由各省照數分攤解部補還限後年二月解足蓋減少三成薄海商民固感朝廷寬恤之恩且展至下半

年始解鉅款亦可從容妥籌免致操切生事此外北方
各省尤爲瘠苦情形亦必相同臣等爲仰體皇仁紓民
力固邦基起見不得已勉籌此策仰懇聖裁施行不勝
惶迫待命之至請代奏臣劉坤一袁世凱張之洞陶模
德壽許應駟奎俊魏光燾李經羲王之春李興銳聶緝
規張仁駿岑春萱丁振鐸鄧華熙俞廉三盛宣懷任道
鎔諫

按此奏於十月十八日奉
旨允准參看電牘便知

致開封行在軍機處

光緒二十七年十月二十五
日寅刻發

前數日英使薩託自京來見密談云聞俄人新改之約
仍係欲專東三省鑛務工商等利顯違各國條約虧損

各國利權中國若許各國必向中國索償聞俄已派人往吉林黑龍江另立鑛務專約如果許之各國必與中國爲難論理各省鑛務應歸朝廷主持各省將軍督撫不應擅許一國專利至此約侵奪中國自主之權如兵數及駐兵處所須商俄官華兵充巡捕不能用礮各條盡奪中國兵權中國直是無兵且此數條未言年限是中國永遠自棄兵權政權尤慮他國藉口但東三省既有去年之亂中國若不暫爲稍事遷就亦難望俄人甘心退還卽普法戰後法人未清還賠款以前亦受普人種種箝制應於各條下明訂年限只可作爲暫時辦法

如俄人未退兵前則兵數及駐兵處所與俄商明巡捕兵亦暫不用礮俄兵退清後則一切悉仍舊由中國自主中國前數年既准俄人在東三省造路俄人自得以沿路駐兵保護但除保路外俄人斷不應索中國亦斷不可讓他項利權如遼河不准造橋及他處造路之類不然他國亦恐在他處效尤也總之此約萬不可照許如中國自與俄議不能得公平之約則可請英美日德法五大國公斷其事其餘小國不必請其與議又云恐中國全權大臣或不知其中詳細利害以爲此只係中俄兩國之約與各國無關倉卒卽行定議實於中國大

有妨礙囑洞轉爲上達朝廷等語次日來函大意略同該使之意最注重鑛路工商等利切實屢言中國若許俄人專各種之權利英日等國必怒必在各省效尤洞九月卅電十月東電兩奏一據日電一據英電已經痛切瀝陳今薩使當面直言無忌不敢不以上聞至其勸我不可永棄主權必須明訂暫時年限一節尙屬持平至將來總以請五國公斷爲妥朝廷如以未定之約不便宣布或卽不必明列中俄現在所議之條款只云此事兩國意見多有不同日久未能議妥請各國代爲持平公斷各國卽可出爲調停於俄亦尙無妨礙總之俄

張文襄公全集

卷八十三

補奏十二

三

約宜詳詢妥商不可貿然遽定謹據情密陳請代奏敬

張文襄公全集卷八十三終

紹興孫家棟校

張文襄公全集卷八十四

電奏十二

致軍機處外務部戶部

光緒二十八年四月初七日戊刻發 發後併致袁

制台

滬探報美康使到滬曾密告人云加稅免釐係英國思攬中國財政大權以後可擴展勢利加稅至十五康不甚願免釐一節中國可自主云云查鄂省去臘電云不得侵我損益財政之權寢電云限我主權爲害無窮產地稅地方稅萬不可免今察各國情形美使所言定爲讜論頃呂盛兩大臣兩支電開送馬使免釐新章竟將

一切稅釐捐款概不徵收含渾包括是所有產地地方營業印花各稅皆不能辦萬分駭異其言加增之數及外省似釐非釐各項捐款之數所計均無確據此舉與中國主權財政關係非輕若無權無政爲洋關所束縛安能立國務懇請旨飭呂盛兩大臣萬不可遽與定議千萬叩禱總之產地稅萬不可盡免卽地方稅營業稅印花稅若不趁此時議定將來外人必不准抽盛電所謂一切捐款概不徵收各路均已杜絕淨盡爲我國計不如過境釐全免進口稅少加而堅留產地地方營業印花各稅利害方足相抵於恤商保權庶可兼顧不勝

惶迫待命之至請代表奏陽西

呂大臣盛大臣來電

并致外務部戶部劉制台袁制台
光緒二十八年四月初五

日申

刻到

廿八日仍會議免釐加稅一節馬凱謂英國近日來
電一商民不願加足十五分之多二恐加稅後內地
釐金仍有影射之弊須約中國切實擔保告以擔保
非難惟欲全免釐金卽加至十五尙不償免釐所失
故擬將出口稅稍增以爲抵補馬謂加出口稅與富
國之策相背天下無此辦法爲中國計免釐爲上策
加出口稅又爲下策不啻自扼其口且加稅後出口

貿易退減銀價低落所得不償所失將來財政轉困
洋債不能清還更啟紛爭之害告以中國亦知此理
但無法以補目前之不足裴稅司乃云如英國商民
不願將進口稅加至十五此議一散深爲可惜或將
進口稅加至值百抽十二五再將出口稅估價後加
至值百抽七五併將出口稅所加之二五廿年後遞
年減除按裴稅司所擬辦法除新約估價所餘約三
百萬不計外照前四年進出口貨本通扯約算每年
洋貨進口加稅多收一千三百五十萬土貨出洋加
稅多收七百四十五萬土貨此口運至彼口及復進

口多收二百九十萬常關多收民船加稅約一百萬扣除原收進出口稅七十八萬每年約共多收二千四百萬以之抵補報部行坐各項釐金一千七百萬尙多七百萬前年戶部屢欲電查各省釐金外銷數目回電或云別無外銷或報數目極微宣懷面詢聶仲帥王爵帥蘇皖不過各十萬兩直隸山東曾服官該省更屬無多即使別省或有不實便將所餘七百萬儘數抵補亦必有盈無絀況釐卡全撤商民如釋重負歡抃之餘另撥新稅如營業稅鋪戶稅印花稅戶部與各省商定新章切實開辦由數百萬以至

數千萬似不難得此皆仿照各國均歸內政洋人不能過問或進一說加稅如稍不足亦應掃除釐金弊政方能力行理財新政況有餘乎江箇電釐免物值輕減不獨民困可紓卽土貨亦可暢銷則金價可平償款可少喫虧反是則稅不能加進口貨日盛釐不能免出口貨日衰金必愈貴銀必愈賤一弊也華民坐受釐金之害百貨滯銷生機日蹙欲行新政處處掣肘二弊也洋商日促其國家推廣聯票擴充租界竭力損我釐金以便其私三弊也馬凱初議口氣尙鬆近則內爲洋商訕謗外被與國譏阻是以願將第

十條第廿一條註銷告我以英國重商訓條順與情
爲主鄂威電謂小田切談商約謂美使不願加稅日
本意與美同裴式楷謂加十五斷做不到所言加十
二五僅少四百五十萬擬以出口加稅並留復進口
補之亦可敷足海寰宣懷按度情勢亦深慮十五難
成現已相持三禮拜到限若我無新章則加稅事必
擱置仍偏議捐釐諸款但此時開送仍宜提高一層
先與商值百抽十五再聽續議謹擬四條另電奉呈
海寰宣懷支

又 光緒二十八年四月初五日未刻到

謹擬開送馬使加稅免釐新章四條如下一英國允准進口洋貨按稅則估價值百抽五正稅及入內地二釐五子口半稅一併加倍完納中國允准進口貨併納加倍之稅後無論運赴遠近何處或轉動或囤儲一切稅釐捐款概不徵收一英國允准華洋商持有運照販運出口土貨按稅則估價值百抽五正稅及二釐五子口半稅完納中國允准出口土貨無論經過遠近何處一切稅釐捐款概不徵收一除以上兩項之外中國國家有權將華商販運土貨行銷中國內地者應在銷場處徵稅但此項土貨在途一切

釐捐亦概行裁除免致有影射以上兩項貨物重徵之弊一中國允以上各款辦到後即將各省釐捐局卡全行裁撤如裁撤後有未能實在奉行或改換名目暗徵進口出口貨物一經報到中國與英國政府即行派人會同查察如有私行徵收情事即惟該地方官是問此四款如不能議辦則所有貴大臣交來之第四款第九款第十款及二十三款第十四款第十七款第十九款第廿四款均屬有損釐金自應一併作爲罷議云以上所擬新章如果應允則第一端可得壹千八百萬第二端可得壹千萬第三端可得

伍百萬三共三千三百萬揣度情勢斷做不到初五
限滿擬先面交馬使聲明姑就本大臣臆見先行開
送如貴大臣可允商議再當奏咨請旨庶免停議仍
屬活筆乞速賜鈞裁電復以便相機因應海寰宣懷
支

致軍機處外務部戶部保定袁制台江甯劉制台

光緒二十八年四
月初七日丑刻發

上年有法國西貢稅司某人來鄂求見商辦熬膏事據
云已託法使在京代謀擬請包辦中國十八省煙膏大
略將天下洋藥土藥均由該洋人熬膏發賣禁止民間

私自熬膏洋商出資獲利與中國均分謂一年可得兩千餘萬以代籌賠款爲詞實則攬我全國利權並報效鉅款以爲餌鄂省未允又託函告江省江省已力駁之前月德商瑞記洋行蘭格踵法人之後亦擬赴京攬辦熬膏并願借巨款數千萬墊辦又來鄂與洞力商據云當託其公使要求并願報效銀一百萬兩志在必成查此事豈可令洋人出資包辦且土藥牽涉民事尤多當已極力駁阻不聽卽日東下由滬赴京并據云法人已將有成說故德商甚急頃聞業已到京百計巧說圖謀萬一墮其術中無論德法是於二赤外又添一國把持

我財政大權加以借伊巨款是永遠在該洋商圈套之中不能擺脫權利兼失如何立國且必於十八省腹地徧布洋員查禁私膏私土家家戶戶無論官民男女皆可藉詞查搜騷擾滋事爲害何窮儻日後民不堪命殺斃洋人須賠巨款則更得不償失矣昨經電告江督劉直督袁皆以爲萬不可行此事上關國家安危下關萬民生命不敢緘默謹飛電瀝陳儻該商喉其公使代求務懇朝廷堅持飭下外務部婉拒天下幸甚請代奏麻

致軍機處外務部戶部

光緒二十八年四月初八日已刻發

魚電謹悉滬支電四條危險已極稅雖加彼有能廢之

權釐一免我無再復之望一也產地稅州縣地方稅紳
董鄉約局稅營業稅印花稅均未言明准抽皆可以改
換名目四字阻我二也裴式楷所算增數萬萬不確三
也即使稅釐相抵亦僅抵舊日之釐斷不能補近日新
籌及將來救急可籌之款四也除洋人所管洋關常關
外不能抽收全國財政聽命洋人不成爲國五也干預
財政卽是干預民政不惟失理財之權直是失治民之
權六也此佛經所謂刀上之蜜甘有限而苦無窮也自
得滬電後焦急萬狀洞麻電諒已代陳惟懇詳審利害
萬勿遽允大局幸甚請代奏齊

發後併致江甯劉制台
保定袁制台全文同惟

未改望兩公詳審利害籌示大
旨萬勿遽復樞廷允定云云

軍機處來電

并致劉制台呂大臣盛大臣
十八年四月初七日子刻到

光緒二

支電並擬加稅免釐四條想已得悉此事關係出入
至鉅如全免內地釐金究竟加稅至十五每年果足
相抵否希即通籌熟酌妥議電復樞魚

致軍機處外務部戶部

光緒二十八年四月初十
日丑刻發

初四日始准呂盛兩大臣咨送奏減茶稅摺稿每擔向
徵二兩五錢今只徵稅八錢旋據江漢關道稟稅司已
奉總稅司電飭令知照茶商此後出口茶稅不得過實
本百分之五等語鄂省既未奉旨亦未接外務部戶部

南洋大臣電咨經由赫德電各稅司減稅殊爲疑惑茶
務日壞敝處屢電深以減茶稅爲然但必須籌有抵補
方可酌減今進口稅未加抵款未籌遽請改茶稅似有
未妥頃接江督劉咨論減茶稅事亦謂如須減稅先籌
抵補就江漢一關而論稅收約二百萬茶稅居其半若
照所議減收以後每年約少七十萬兩所有京餉洋款
何從湊足推之閩浙廣東江海各關皆有茶稅綜計短
收之數亦必有百餘萬惟有仰懇聖恩可否將減定
茶稅明白宣諭緩至明年開辦各茶商知明年起便可
脫去重累已足歡動鼓舞俾各省關得以早籌抵款若

必不能更改則江漢關短徵七十萬之數應請戶部將京餉洋款如數核減改撥並請旨切飭呂盛兩大臣會商赫總稅司迅速另籌抵補的款以免貽誤請代奏佳戶部來電

光緒二十八年四月十三日申刻到

佳電悉商約大臣奏請減輕茶稅外務部戶部會同覆奏奉旨允准卽劄行總稅司將出口茶稅改爲按照時價值百抽五並電飭各關稅司遵辦自難緩至明年開辦惟茶稅旣減茶葉自當暢銷且原奏聲明於別項出口貨稅加增抵補業經本部電催迅速籌定尊處亦可電詢由何項加增是茶稅減征尙不至

無著究竟能否相抵應俟核明再議辦法戶部文

致外務部

光緒二十八年六月十二日發 盛大臣主稿 同莘按商約條款具見官

且此爲盛大臣主稿本可從略惟下文往來諸電俱就條款立論是此電實爲下文諸電之根又條款字句亦與定本微有不同故錄此電以見其中曲折至最後畫押條文雖會銜電奏自可不錄此外四銜會電之稿非公主稿者亦不備載附識於此餘可例推

免釐加稅條款如下
統綱第八款茲中國國家認定若
在出產處或於轉運時或在指運處向貨物征收釐金
以及別項稅捐辦法係阻礙貨物不能流通及傷害貿
易之利是以允願除第八節所載之限制外盡裁此項
籌餉之法英國國家允許照現行之通商稅則外添加

一稅餉於英國商民運進洋貨之時及定運出口之上
貨時征繳以爲酬補中英兩國彼此訂明所有征抽行
貨釐卡及別項關卡裁撤後不得改名或藉詞將此項
關卡復行設立進口洋貨所加之稅須按一千九百零
一年九月七號中國與各國簽押之和議總綱所載之
進口正稅加一倍半之數卽值百抽十二五不得有逾
此項進口正稅及添加之稅一經完納其洋貨無論在
華人之手或在洋人之手該貨物無論原件或分裝均
得全免重征各項稅捐以及查驗或留難情事出口土
貨所輸納之稅其總數無論如何總不得逾值百抽七

五之數中英兩國心存以上所定之宗旨故允願辦法如下第一節中國國家允將十八省及東三省陸路鐵路及河道向設各釐卡及類似抽釐之關卡概予裁撤惟在沿江沿海通商口岸及內地之河道陸路或邊界現有各常關不在此例第二節英國國家允願洋貨於進口時除按一千九百零一年所訂和約內載貨稅增至切實值百抽五外再加額外稅照切實值百抽五增至一倍半之數以抵裁撤釐金子口稅及洋貨各項征收並酬此款所載各項整頓之事惟不得有礙第三節常關第五節土藥第六節鹽斤各項土貨可於銷售處

征收稅項之權第三節現存所有之常關無論在沿海沿江之通商口岸及內地河道陸路與邊界載在戶部工部則例大清會典者均可仍舊安設須開列清單註明地址照送存案其有洋關而無常關之處及沿海沿邊非通商口岸之處並可添設將來如新開通商口岸應設洋關者常關亦一併安設至內地舊有各常關地址或有應由某處移改至某處以合貿易情形可隨時酌改照會英國政府更正入單但不可逾舊有額數又第三節民船或帆船進出通商口岸裝載貨物所征之稅不得少於輪船裝載同類之貨所納進口正稅以及

加稅之總數土貨由此處運彼處自產處起運到內地
第一常關只准照洋關稅則征收第七節所載之出口
加稅給予憑單載明貨色件數斤重若干並指銷之處
及所征稅數報貨出口限期至少一年持此單據無論
經內地何關均不得再征稅項及查貨留難阻滯如該
土貨不在租界以內銷售應照征銷場稅如運至通商
口岸出口准將該單據交該管之關驗明抵納應加之
出口稅又第三節凡民船民艇及車輛除應抽公道捐
輸定爲每年若干按時征收外不再另有捐抽惟現在
所抽船鈔船料不在此列第四節洋藥現在併征之稅

釐仍舊辦理以後應將該釐金作爲加稅第五節英國
本不願干預中國征抽土藥稅項之權惟須聲明不得
藉此征稅留難百貨中國在各省水陸邊界要關仍留
舊設之土藥稅所凡所有應繳各種稅捐作一次交納
卽算在該省之內已完清各項稅征給予每塊印花黏
貼以爲完稅之據各處查緝私貨應用巡勇警察分設
局所但不得築有卡欄或別項阻礙之具至此項土藥
局所用警察巡勇不得留難別項貨物及收征別項貨
稅並須將所存各局所處數開單照送存查第六節鹽
釐名目須改爲鹽稅可按現征之釐金數目及別項征

捐加入課稅之內此項稅課或在產鹽地方抽收或在
銷鹽省分進境第一局抽收並可任便設立各項報驗
公所凡船隻按照鹽引運載鹽者須在該公所停船候
驗蓋戳放行但不得征收釐金或別項征捐並建設各
項卡欄阻礙之具第七節現在出口稅則應從新整頓
無論何項土貨或出洋或由中國此口運至彼口可增
收至切實值百抽五惟須預先六箇月通知商人如現
在稅則有逾值百抽足五之數者亦須裁減無逾至於
絲斤一項不得征抽加稅亦不得在蠶繭或蠶種所過
之常關征收正稅惟中國可按逐件切實估價定稅之

法抽一出口正稅不得逾值百抽足五之數目又第七節因裁撤釐金之故所有土貨出洋或此口運彼口之出口諸稅除上款除值百抽足五外再照加收半稅以抵裁釐所失第八節中國既裁釐捐以及向有內地征收洋貨別項稅捐實於進款大有所失今進口洋貨出洋土貨及由此口至彼口出口貨所加之稅冀可稍補內地貿易釐金進款之所失惟內地貿易釐金之所失仍須籌補是以彼此訂明中國國家可任便向不出洋之土貨征收一銷場稅但不得於貨物轉運時征收只可於銷售處征收抽中國國家言明此項銷場稅之辦法

不得於洋貨有所妨礙凡貨物既屬洋貨一經洋關驗放之後即可免一切稅捐及留難阻滯之事凡洋貨與土貨相類者若貨主完納進口正稅及所加之稅後向稅關按照每包請給憑單免致內地有爭執之虞其單洋關亦須照給凡民船運至通商口岸之土貨其在本地銷售者無論貨主是何國之人應報明常關以便征收銷場稅又第八節此項銷場稅數目多寡可任由中國自定視貨物種類斟酌即視其貨或係民生日用所必須及僅止富貴家所用貴重之物而定征收多寡惟同類之貨無論是民船帆船或輪船裝載須一律征收

但此項銷場稅應按照第二節不得在租界內征收第九節凡洋商在中國通商口岸或華商在中國各處用機器織成之綿紗及造成之棉布須完一出廠稅其數係倍於一千九百零一年和議總綱所載之進口正稅卽值百抽十凡外洋進口之棉花如爲織布紡紗局購用中國須退同所抽之進口正稅全數及所抽之進口加稅三分之二卽按照所收進口正加各稅值百十二分五退還值百之十分如各織布紡紗局係購用土貨則須將所征之各稅及銷場稅全數退還凡在中國用機器織成之棉紗或造成之棉布既完出廠稅後所有

復進口稅出口正稅出口加稅以及銷場稅概行豁免
此項出廠稅須由洋關征收凡別項貨物與洋貨同者
若洋商在中國通商口岸或華商在中國各處用機器
造成亦須按照以上辦法及章程辦理湖北鐵廠及中
國國家現有免稅各廠以及嗣後設立之製造局船澳
等廠所出之貨物不在此款所言出廠稅之列第十節
由各省督撫自行在海關人員中選定一人或數人商
明總稅務司派充監察常關銷場稅鹽務土藥各事宜
第十一節凡貨物轉運之時或有不合例之需索及留
難情事一經商人告發卽由中國國家派華官一員會

同英國官員一名及海關人員一名彼此職任均須相稱以查其事如查出實有留難受虧確情則由洋關從所加之稅項下撥款賠還至查出該舞弊之員應由該省大吏將該員從嚴參辦開去其缺儻查出實係誣告原告商人應罰還查辦一切費用第十二節中國國家允願若此款允准全款照行按照南京及天津條約所開各通商地方將下列各地開爲通商口岸卽湖北之長沙四川之萬縣安徽之安慶廣東之惠州及江門凡洋人在該通商口岸居住者須遵守該處工部局及巡捕局章程與中國居民一律洋人非得洋官允准不能

在該通商口岸之界內自設工部局及巡捕英國國家若不允照此次全款各節則不得索開以上所言之通商口岸惟江門一處另載第十款內不在此列第十三節按下列第十四節所載明者若能遵依則此項辦法可由一千九百零四年正月初一日舉行屆時所有釐卡須盡裁撤凡經收約內所禁止稅項之人員亦均須辭差第十四節凡在中國應享優待均沾之國亦須與中國立約允照英國所定英商完納加增各稅中國國家方能允照此條所載各節辦理凡各國與中國現在及以後所立之條約其有優待均沾之條者須一律照

樣允立此約又各國不得明要求中國或暗求中國給以政治利權或給以獨占之商約利權以爲允願此條之基礎英國國家方能允照此條所載各節辦理第十五節儻各國在中國有利益均沾之條者不照英國按此條第十三節所允承於一千九百零四年正月一號舉行辦理各節各國不肯照樣一律辦理者則此約不能舉行直至各國聲明照辦方可舉行第十六節免釐之款一經議准卽由中國國家明降諭旨用膳黃布告於眾言明所有釐金盡免所有釐卡盡裁至常關及內地各項貨捐除此款所載外餘須盡行裁除所降上

諭亦須載明如有背約之員卽責成該省大吏從嚴懲辦開去其缺馬凱並議及此項加稅原爲抵補所裁各省釐金應由海關提出按照各省報部或名釐或不名釐金而等於釐金數目每月徑解各省藩庫給同地方之用免各省裁釐不實暗中阻撓請載入約俾此事切實可靠經坤一等再三辯論此係我之內政不便照允馬凱疑終不釋堅請將來須備照會作爲約中附件以昭信守未便過於爭執祇可姑允照辦併以附聞乞代奏坤一之洞海寰宣懷軫二

同華按是日尙有軫一電稿一件詳陳在鄂會議情

形今缺

外務部來電

并致劉制台
六日午刻到

光緒二十八年六月十

奉旨劉坤一等十一日會奏電何以遲至十四日始到所陳各節究竟加稅之數與免釐之數是否確足相抵據稱連報部而不名釐金之款二千三四百萬兩而呂海寰盛宣懷前奏加稅所入係二千一百餘萬兩卽此已難抵補銷場稅一項究竟各省分計可得若干總之此事於財政出入關係甚鉅不可不深謀遠慮若倉猝定議宜防後患著責成劉坤一張之洞切實通籌從長酌議迅卽單銜分別電奏欽此外務部咸

致軍機處外務部戶部江甯劉制台

光緒二十八年六月十七

日丑
刻發

咸電旨謹悉加稅免釐自應籌足抵補已於願電會江督電復戶部矣茲奉旨通籌酌議用敢詳陳查馬使在滬議加稅之數於報部名爲釐金者實已抵補有餘惟所擬銷場稅辦法則他款似略有不敷今照鄂議增多三款必無不敷之慮一常關辦法可增鉅款也徧查戶部稅則舊章最輕因承平物價賤之故今日估本每值百者不過抽一釐半釐從無至一分者人工絲稅每百斤不過征銀二三錢至二兩餘布稅每匹不過征銀二

三釐芝麻每一石一百五十斤不過征銀二三分銅器每擔不過征銀二三錢至四五錢舉數大端可例其餘今議定由總稅司按今日時價確估稅則刊布天下抽足七五稅第一道內地常關止收二分五釐至出洋及轉口之洋關或洋關兼管之常關再抽五分若仍銷內地者再抽復進口二分五合內地常關所抽之二分五轉口常關所抽之五分復進口之常關所抽之二分五統計較舊額加至十倍上下不等蓋舊日常關正稅少而需索多新定常關辦法正稅增而中飽絕故國民均利必可歲增四五百萬馬使在滬議除稅司兼辦之常

關外概須裁撤到鄂後與之力商先允留水路常關陸
關全撤次允留陸關又次允有洋關處添設常關又次
允於沿邊沿海非口岸處酌添常關此事無可再爭矣
一新議銷場稅其數鉅而活也查滬議銷場稅指明開
出貨色若干種且係只能在內地非通商口岸之處貨
到零售店鋪始能按店抽收不能在上岸處按貨抽收
爲數甚屬有限且自占營業稅地步到鄂後洞另與馬
議但係租界之外無論口岸內地皆可抽收不必貨到
店鋪之手卽於登岸或到地處設關抽收貨色亦不必
開單但非出洋之貨卽可其抽數多少由我隨時自定

與今日之落地釐無異各省合計爲數尤鉅其實止是
免行釐留坐釐六字但洋人總不允存釐金之名耳若
各省分計雖難知其確數大約較該省原有釐金數目
至少可抵一半應由各該省體察情形若欲恤商恤民
則可減至一半之內民更樂從若餉需緊急則加至一
半以外亦無不可其間伸縮寬嚴其權全在於我蓋洋
人主見總是嚴於國用而寬於民用故洞與議銷場稅
謂此爲辦地方之事若自強諸要政之類因之彼不甚
阻然假使常關等項增收不多卽由各省酌以銷場稅
補之亦有何難蓋銷場稅一項彼既不阻我財政之權

我卽有籌抵足敷之法矣一出廠稅已加增也查滬議洋商在中國口岸製造已定爲出廠稅抽七五所用洋棉花稅全退還到鄂後改爲出廠抽十用洋花則退還十分仍征二五用土花則全退還此抑洋料銷土料之微意也至於鹽土兩卡馬皆欲撤今與議定土藥征稅仍舊但改卡名鹽則甯與議妥產鹽省分收課稅辦法在鄂又與議妥銷鹽省分抽稅辦法俱於舊額尙無大礙此外力爭挽回之事尙多另電續陳實不能再索他項抵補蓋馬使久居印度係該處富商總董尙不染駐華洋人習氣故詞氣雖強硬性情尙爽直我以至誠相

待尙可商量洞會議八次屢次欲裂復合此次惟有先
定英約則日本法德皆有比例關係各國商約之樞紐
卽在於此英議旣不日卽散若此機一失英變前議各
國交乘悔不可追矣竊思外省疆臣斷無不思多留進
款之理惟此約反覆籌計中國實不喫虧在我已爭無
可爭在彼亦讓無可讓惟望早賜宸斷核准不勝迫切
待命之至請代奏鈺

外務部來電

光緒二十八年六月十八日子刻到

奉旨劉坤一張之洞呂海寰盛宣懷等先後電奏加
稅免釐請旨卽行定議等語旣據該大臣等通盤籌

計均稱足敷抵補著卽照所議辦理惟所陳各條內
尙恐有侵我利權之處流弊不可不防仍著悉心籌
慮妥定一切儻有後患惟該大臣等是問欽此外務
部

致軍機處外務部戶部江甯劉制台

光緒二十八年六月十七

日亥
刻發

前數日馬使索議修改鑲章添開口岸推廣口岸權利
推廣內河小輪等事總以此四事與加稅併爲一案成
則俱成散則俱散爲言洞因告馬使曰到鄂後數日內
議定之條款甚多今又將無關加稅之事索我與議皆

是英國所要索於中國者中國亦應向英國要索數端
方爲公平若不肯商我便不與議今日不開談矣馬使
初以爲甚難謂此約只應英向中索不應中向英索力
爭始允因與商索兩條一中國改修法律後英人歸我
管轄一請各國派員會同中國官員考查各省教務妥
籌辦法因與定議入約法律列爲第十二款其文曰中
國深願整頓本國律例以期與各西國律例改同一律
英國允願盡力幫助中國以成此舉一俟查悉中國律
例情形及其審斷辦法與別等相關之事皆臻妥善英
國可無妨棄其治外法權之時英國卽允棄其治外法

權等語教案列爲第十三款其文曰中國之意教事必須詳細商酌以免從前嫌釁滋事將來復萌儻中國與各國派員會查此事妥籌辦法英國允願會同派員查議妥籌以期民教永遠相安等語查日本三十年前始創修改法律管轄西人之謀商之於英賴英首允其議被國君臣從此極力明法修政有志竟成至今西人竟皆遵其法令日本遂與歐美大國抗衡以中國今日國勢馬使竟允此條立自強之根壯中華之氣實爲意料所不及馬云此事英政府有無挑剔尙不可知當發電力勸等語其教案一條馬在滬曾經深拒不與我議在

鄂又推諉事關各國且伊不諳教務等語亦係強而後
可查此後教案必須商明各國妥籌補救之法法國專
主袒教不肯和商他國雖或間有持平之論亦不肯明
言會查今由英開其端以後再商美商德若英美德皆
允查辦法自不能獨橫民教果能相安關係大局安危
實非淺鮮且與馬使議明此兩條如英廷照允卽當與
加稅免釐全約同時畫押祈代奏請旨核准電復至禱
洞海宣同叩洽

外務部來電

光緒二十八年六月二十日辰刻到

奉旨張之洞呂海寰盛宣懷等十七日電奏各節具

悉加稅免釐一事昨據劉坤一等會奏已有旨允准
并責成該大臣等悉心籌慮妥定一切茲據奏擬以
修改法律及各國派員考查教務兩條一併入約自
可照行惟據陳索議四條何以前次會奏電內並未
提及至推廣口岸權利語尤含混其詳細節目究竟
如何仍著該大臣等詳慎妥議懍遵前旨切勿稍貽
後患欽此效

致外務部江甯劉制台

盛大臣主稿 光緒二十
八年六月十九日 刻發

馬凱所請推廣內港行輪章程推廣通商口岸利權擬
列作第十第十一款查內港輪船一節係在通商口岸

之外行駛實慮漫無限制惟馬凱以光緒廿四年總署與各國訂定章程本已准其任便專作內港貿易並拖帶船隻裝載貨物行駛內港但凡內地河道皆准其行駛當以內港二字應作通海通江之港論其不通海不通江之內河應不在內馬使以原定章程指明內港二字卽與煙臺條約內所論內地二字相同查煙臺第三端第一節係指不通商口岸而起卸貨物之內地尙有限制第四節係指洋貨運入內地及內地置買土貨沿海沿江沿河及陸路皆屬內地實與馬凱原索之僑居貿易之內地無甚區別不過所爭者沿河不沿河而已

復告以各國並無他國輪船可駛不通商之事馬凱云
中國已經允准斷難翻悔又告以凡華商輪船駛往之
處方准洋商輪船駛往如華輪不准行者洋輪自不能
准馬凱云此無非欲借華輪爲限制洋輪之計亦爲原
議所無辨論數次僅允小河向築閘壩有礙水利者輪
船不往此款日本亦必力爭於內地權利實有關係已
電請外務部詳詢赫德內港二字究應作何解釋若無
限制只能於修改章程中極力挽救故條款內訂明彼
此允願修改附載此約之後彼請比照日本舊約准其
租棧辦法駕而上之請於駛行之處設立棧房馬頭雖

再三駁拒彼仍堅執現允其租用機房馬頭而不准洋商居住並須照華人輪納稅捐且仿照日本辦法只准租二十五年暗中將向來永租九十九年之害打破聊以補救萬一馬凱又以第八款載明英廷若不允照加稅則不得索開各口岸惟江門另第十款內不在此例議款如下茲因一千八百九十八年內地水道已許凡特准註冊之中外輪船行駛以利便各通商口岸之貿易又因是年七月二十八號所定之章程及是年九月所續定之章程間有於行輪未便茲將章程彼此允願修改附載此約之後按照遵行直至日後彼此允願更

改爲止凡在中國內港行駛之輪船如有損傷隄岸開
壩或各項工程應責成該輪船將該隄岸工程損傷以
及他項因傷受虧一切賠償業主如有淺水河道恐因
行輪致傷隄岸開壩以及相連之田地中國欲禁小輪
行駛者知會英國官員查明實有妨礙卽行禁止英輪
行駛該河但華輪亦須一律禁止英國輪船東可向中
國人民在河道兩岸租棧房及馬頭不逾二十五年租
期期滿如彼此兩願續租亦可從新再議章程儻英國
輪船東不能以公道之價向中國人民租得棧房及馬
頭者則可租地建立棧房及馬頭其租期亦以二十五

年爲期如期滿兩願續租彼此亦可從新再議租約惟
議租時須報明地方官存案英國商民所租棧房及馬
頭須納稅捐所租之地亦照納稅捐如同中國人民左
近相類之房產一樣英國商人只能用中國代理人及
辦事等人在該內河行輪處所居住貿易英商亦可隨
時前往察視其生意情形又中英兩國議定將江門開
爲通商口岸又議定除緬甸條約專款所載各地方外
准英國輪船在下列各地按照長江輪船停泊處所章
程起卸貨物及搭客卽北山口羅定口都城又議定英
國輪船准在下列東西江十處起落搭客卽容奇馬甯

九江古勞窪永安後灘祿步悅城六都封川至章程應
須修改之處卽請外務部仍交總稅務司詳細從速核
議以免疏誤又馬使所索通商口岸應有利權一節按
馬使前此抄送光緒二十四年各駐使照會總署文稿
辯論城口二字甚詳卽請大部查示旋奉電復作爲城
邑之口辯駁遵卽照辦馬使謂當時總署並未照復西
例應作爲默許況係舊約載明以口岸起訖界址迄今
未定常有爭論是以必欲聲請檢查江甯條約雖載城
邑爲領事等居住港口爲民人等居住貿易而天津條
約則已併城口爲一准其任便居住貿易況馬使謂華

英文不符英文則並未區別令繙譯等細核馬使所言
尙實際此時局斷不能強令將舊約已許者刪改既無
此權力更難措詞抵制然又不能不設法挽回一二且
日本馬關條約直載明城鎮字樣較英約更爲寬廣將
來與之議約更無法關闌因與馬使推誠相告極力商
籌始允含渾聲敘如派員會定界址按照地方情形及
條約定立將來英必可事通融若此時欲將城邑等字
明爲抹去馬使斷做不到亦理所必然並與商允如在
租界外居住洋人須遵守該處章程卽在租界內居住
華人亦不准免繳各項稅捐稍可挽回治權利權藉償

舊約所失議款如下英國人民按照條約應享通商口岸利權因界限不清隨時常有爭辯茲已議定如英國或中國國家欲派員會同定立界址卽當就地會同派員按照地方情形及按照條約定立口岸界址以免爭論外國人民在租界之外居住須守該處地方上現有工部巡捕之章程與中國人民一律遵守無異非先商准中國官員不能自行設立工部局巡捕局中國人民無論在租界內或他處居住者應繳納各項稅捐不准假用英人之名希圖免繳以上兩節馬使力請核定方允將第八款加稅一起電致英廷加以到鄂後馬使允

我管轄之權及商議教案兩條共成十三款英約已完
俟英廷核准即可具摺陳奏定期簽押請代奏迅卽電

示洞海宜效

是日尙有致外務部效電一件今缺

外務部來電

光緒二十八年六月二十五日丑刻到

奉旨張之洞呂海寰盛宣懷等電奏所議內港行輪
章程及推廣口岸權利兩款請迅卽電示等語核閱
各節於治權利權皆被侵損流弊茲多著責成劉坤
一張之洞等再行詳慎籌商妥議具奏欽此外務部
敬

劉制台來電

并致外務部及上海呂大臣盛大臣
光緒二十八年六月二十五日丑刻到

養晚接鄂發兩會效電詢係綫阻故遲到河內行輪
本係干以約外利益廿四年先後定章定有限制祇
准由口岸至內地并由所至內地回口岸並非准其
內地到處任意行駛既有定章在先誠難翻異第事
本約通融官民已受累不淺若再不抱定原限受累
更無底止無論如何要挾必當萬變不離其宗斷不
能於原章限制稍有放鬆至內港二字照煙臺約第
三端第四節所論內地二字相同實係定章之初爲
赫等欺朦所誤今已無可補救惟有執定原章行駛
爲限庶免再受虧損此事與正經貿易之英商實無

利益徒使中國受無窮之害不知馬使何以要求及此卽赫議廿四條內亦謂小輪章關係不小惟所云察看各省損益隨地議定亦非妥善辦法事不可行幸鏡杏翁堅爭之際并切向開解不必使人損我又不能以公道之價租得棧房准其租地自造此亦萬萬不可蓋租賃民房租價高下雖同在一處亦難有定我以爲公彼謂不公必欲自建卽難阻止若小輪到處可以行駛所至內地又可建造棧房是水鄉各處與全行開通無異煙臺約沿江六處上下大輪之貨尙不准其設棧豈有內地小輪運貨轉許建棧之

理況小輪從無裝運貨物卽拖帶貨船亦復罕有之事此其意實不在儲貨之棧直注意在到處開通使我不獲開通之益實受暗爲開通之累如彼必欲議立此款必當切實聲明祇准由口岸至內地并由該內地處回口岸斷不能由此內地至彼內地任意行駛并不准自建棧房此爲扼要之著至口岸一節中國通商始於道光年間江甯條約第二款載明上海等五處港口貿易通商此爲關口之始通商之處所以名口岸者以其在口之濱岸地方便於泊船貨物上下也天津約雖有城口字樣城口旣不能作爲城

內大凡通商之區多係近有城邑所謂城口卽係城外之口之謂亦指買賣往來而言至於聽便居住賃屋租地等事本款下文卽載明悉照已通商五口無異無論英文如何第旣與五口無異是仍祇能在港口居住貿易尤爲鐵板住脚是以煙臺約第三端第二節載明新舊各口岸除已定有各國租界應毋庸議其租界未定各處應會商各國將洋人居住處劃定界址云云中國已開新舊各口租界無論已定未定而通商之區要均在江河濱岸之地照煙臺約已劃定者固無庸議未劃定者亦不過將居住地段廣

狹酌量商定而已此不獨有各約可證更有實事可
憑通商開口已歷數十年久有成約成法何能至今
日由馬使強詞爭辯希圖翻異至馬關約第六款第
一節所云添設口岸均照向開通商海口或向開內
地鎮市一體辦理此指馬關約索添各口應照已開
各口辦理而言故商約解義謂日約以西約爲本比
英美等約字句雖有不同施行要歸一律西人應得
之利益日本無不從同西人未得之利益日本亦未
嘗特異各省解說當知此意云云今馬使議款雖於
城鎮等字蓋而不露然照所議不獨未定租界之處

將來會定必致於城內外任意擴充卽已定之處欲爲翻異亦可執後約爭擴勢必將口岸繁盛之處爲其併入界內於口岸事權利權盡失銷場之稅亦無可抽收此實萬不可允彼如必欲立款祇能照煙臺約聲明已定有租界者無庸議未定有界限者仿已定辦法量商務衰旺酌定廣狹會商界址庶得援已定之辦法範未定之界限不致將城鎮一併牽入此亦爲至要關鍵未可稍有退讓者總之馬使前議加稅必欲中國政府允准照會該使方能轉送英政府勸請依辦今又謂須前兩款核推方允將加稅一起

電致英廷得步進步無非任意要挾加稅以免釐相
抵并非別有利益斷不能與稅釐毫無干涉之事因
此牽連強我受虧惟在鏡杏翁有以力折其非外部
主持於內大局幸甚坤漾

致軍機處外務部戶部江甯劉制台呂大臣盛大
臣 光緒二十八年六月二十一日未刻發

效電旨謹悉馬使議四條乃久已在滬向呂盛兩大臣
索議之事非到鄂始索議也其一條爲添開四口岸已
於會奏第八款內奏明其二爲修改鑛章已於十四日
電達外務部並接外務部復電茲謹於本日另電奏明

其三爲口岸權利其四爲內河小輪已於十八日將擬立約文及利弊原委詳晰會電外務部據呂盛兩大臣云惟第八款關涉加稅免釐者應歸入會奏此外電外務部即可應請旨飭令呂盛兩大臣補行電奏抑或飭令外務部照錄原電進呈以期迅速恭候聖裁查口岸權利一條十七日電奏謂之推廣者乃揣度馬使來意所圖謀者如此故揭明其隱以見必須力辯嚴防至議定立約時其文內並無推廣字樣有十八日會致外務部電可查馬使注意專在城邑二字以江甯天津煙臺馬關各條約有城邑城口城鎮等字樣在滬及長江同

船爭論不知若干次到鄂復議因多方設法開悟馬使
令其不必專爭此條於英並無大益馬忽領悟遂不指
定城邑並將原款全境及城內城外等字刪去自願以
請定口岸界址了事並自願加入就本地情形之語洞
又加入住租界外者須守中國工部局巡捕局章程彼
亦允許是此次約文於此節只有就舊日條約所有者
加以限制並未允其推廣況近年洋人在各處口岸之
外任意購買地基愈趨愈遠漫無限制正宜趁此將各
處口岸界址各就各處情形會同永遠訂定勿令逾越
今馬使自願改爲此等字樣實屬於我有益此一事也

至內河小輪一條流弊誠多彼執光緒二十四年總署已許內港小輪之案力欲推廣查核各關通行二十四年章程洋文內港二字卽是內地二字故此條駁阻極難此次約文僅止大略皆係設法酌加限制考察之意如馬頭行棧不用洋人租限二十五年不得承租之類至其緊要全在詳細行輪章程馬使欲令裴賀兩稅司往與伊議議兩三日後閱兩稅司所擬仍未妥帖故章程堅持不肯與定曾見赫德三月內致盛函言內河行輪要端四條語語扼要因與呂盛商莫如歸赫議爲妥十八日馬使將行來晤力催小輪事洞告以此事乃赫

總稅司專責須由赫酌定我與呂盛兩大臣於行船細章皆不甚解裴賀兩稅司權力不足只可送交赫詳酌矣馬甚不願而無可如何相持久之馬遂以可允到滬斟酌一語自行轉圜而罷此二事也至新開四口岸一條與之約明洋人不能設工部局巡捕局已載入約嗣後並允不設租界亦經照會存案此雖名爲通商口岸實與自開口岸無異此三事也覆核前次電奏實不敢稍有含混總計馬使索議各條皆係在滬屢向呂盛爭論者呂盛皆有電達各省從無到鄂創索開議之事至在鄂所允者皆較在滬所議爭加甚多從無較滬議減

讓之事因奉嚴旨不勝惶悚不敢不據實陳明除由呂盛兩大臣自行覆奏外謹先釋宸厯請代奏簡

致軍機處外務部戶部江甯劉制台

光緒二十八年六月二十

一日申

刻發

前接外務部真電以馬使必欲在鄂議鑛務查鑛務一款馬使抵鄂卽以爲言洞照滬議力駁以此事不應列入商約且路鑛設有專管章程已照會各駐使卽有應行修改須向部商辦馬使堅以鑛事有關商務修改係屬兩益此次加稅本非英商所願故必須列入商約以慰英商之望俾英議院不致有所扞格若不議鑛務則

一切罷議相持許久洞等再四密商馬使交來之款係欲中國允照英國指出之意修改章程如此自然不可與議莫若由我自出一辦法與之商訂須由我采取各國通行章程酌量仿照修改改定後令各國開鑛洋商一律照辦則於我主權利權必無所損且不致爲一國獨擅其利蓋西國與中國立約不免恃強攘利若西國與西國通行之約必是公平斷不肯令本國自損權利是照各國通行章程已將馬使照英國之意一語全行化去蓋照外國指出之款修改則人爲政而利在人矣我采各國章程改定後令洋商照辦則我爲政而利在

我矣幸彼無詞可駁居然照允此次美國開來應議條款有美國人應得在中國無論何處購租鑛地開辦各鑛一條漫無限制必應駁阻且將來法必爭川滇鑛德必爭山東鑛若藉英約議有限制以後即可爲駁阻美法德之根且可將從前鑛章未經想到防到者補訂周密此乃將彼所索有益於彼之款變爲我所索有益於我之款實於中國有利無害事機可謂湊巧嗣接外務部洽電章由我改不失自主之權惟另議不入商約更妥希詳核辦理洞等公同商酌此舉旣於中國有益無損莫若入約爲妙恐狡黠洋商不願受我範圍甘守公

道挑播馬使將有翻悔他國更難繩削馬使又請議立
期限慮我允而不行因與訂爲第九款其文曰中國國
家因知振興鑛務於國有益應招徠中國及外洋資本
興辦鑛業是以由簽立此約之日起允於一年內自行
將現行章程修改妥定中國應卽認真迅速考究鑛務
采擇英國印度及各國通行鑛務章程中之於中國情
形相宜者將現在之鑛務章程從新修改以期一面於
中國主權毫無妨礙於中國利權有益無損一面於招
致外國資財無礙比較外國通行章程於鑛商亦不致
有虧俟中國所定之鑛務新章一經頒行凡承辦鑛務

者卽須照新章辦理等語查印度開鑛章程乃英國自爲印度主人定此鑛章以待各國來開是印度之鑛卽英鑛也其章程已經譯出地主之權甚重限制甚多分利甚優并聞他國鑛章各有佳處儘可由我博采當卽分投訪尋會與馬使切實聲明須採用各國通行章程不能專采一國馬已應允請代奏之洞海寰宣懷同叩箇再此電十九日洞已與呂盛兩大臣面商定稿因洞連日患病至今未愈是以今日始發合併聲明

致外務部

盛大臣主稿
九日發

光緒二十八年七月十

准英使馬凱照稱現奉英政府訓條謂應議定所加之

進出口稅須留爲各省督撫以抵向來所收百貨釐捐之用不得將此進款歸入海關正款亦不得抵押新借洋債請將此事奏陳並請明降諭旨卽與條約一併宣布等因查此事雖經於會奏第八款時陳明在案惟究係內政不便據馬使照會入告致啟外人干預之漸應作爲坤一等陳請奉旨後將此原奏及所奉諭旨照會英使作爲約中附件較爲得體謹擬會奏電陳文曰竊查各省所收各項釐金款內以撥還息借洋款爲一宗撥解京協各餉又爲一宗其餘留供本省度支現與英國修改商約彼此議定加稅以補第八款所載應裁各

項百貨釐捐除還現在洋債抵押本息外自應分別撥
補抵解免致各省爲難並不得挪作別項之用及將此
款抵押新借洋債亦不得歸入海關正稅項內以符加
稅抵補百貨釐捐之原議相應籲請將上列各節明降
諭旨飭下戶部查明各省裁免各項釐金向來應解應
留各數目俟加稅免釐條款舉行開辦之日分別派撥
各省俾資應付而昭允協請代奏坤一之洞海寰宣懷
效

軍機處來電

并致劉制台呂大臣盛大臣 光緒二
十八年七月二十九日亥刻到

奉旨劉坤一呂海寰等電奏悉所有十九日電請旨

一節仍著責成劉坤一張之洞妥酌如果別無用意確無流弊卽行傳旨著照所請欽此豔

致軍機處外務部

光緒二十八年七月二十八日寅刻發

恭讀有電飭令畫押諭旨內云仍將各條詳核務臻妥善儻有後患惟該督等是問等因曷勝欽悚查內港郵政一款係外務部據赫德所擬辦法令添入約甚爲周妥今馬凱兩次所改約文與部電之意大不相合部電係除中國郵政局信外概不准帶其意蓋謂不准帶外國信也方今沿海長江各國已設郵局不易收回惟有內地水陸各路赫德正在分設尙可略存中國權利今

內河洋輪准帶洋信列入約章從此內河郵權亦不能自主矣如不入約以後尙可徐商故洞三次電請外務部詢赫德此款馬改之文或應刪或應留以便遵辦迄未蒙電復今雖奉旨畫押聞呂盛大臣尙以加稅撥款字義不足馬使未肯畫押電奏請旨又接呂盛有申致外務部電郵政節內有云此節如須刪去卽毋庸議是此條現在尙可刪除蓋鄂請詢赫酌刪者乃刪馬使所改之文非刪外部電令增入之文也若照部電赫擬原文則極爲周密妥善豈肯刪之呂盛電謂郵政一條部令增入江鄂請刪實屬誤會竊思此時如已詢赫德以

爲不必刪則毋庸議如尙未詢赫可否請旨電飭呂盛
大臣如尙未畫押卽將此條刪去以待將來妥籌如已
畫押則只可飭赫德另籌救補之法洞爲恪守部電原
文遵旨慎防後患起見不敢不據實陳明恭候聖裁請
代奏感亥

張文襄公全集卷八十四終

新城王樹樸校